

समे – 12:25

<><><><><><>

Day Easter

ईस्टर दा ध्यार अज्ज समूलची दुनिया च धार्मिक श्रद्धा ते जोश जज्बे कन्नै मनाया जा'रदा ऐ। मानता ऐ जे सलीब पर चढाए जाने परेंत प्रभु यीशु अज्जै दे ध्याड़े परतिये जींदे होई गे हे। कल रातीं देसे दे बक्ख-बक्ख गिरजाघरें च अददी रातीं आली ईस्टर प्रार्थना दा सरिस्ता कीता गेआ। इस ध्यार गी नमीं शुरुआत ते बसंत ऋतुते दी आमद दे प्रतीक ऐ। राष्ट्रपति द्रौपदी मुर्मू होरें ईस्टर मौके भारत ते बाहरले मुल्खें च रौहने आले नागरिकें टकोहदा करिये ईसाई समुदाय गी बधाई दित्ती ऐ। अपने सनेए च श्रीमती मुर्मू होरें आक्खेआ ऐ जे एह ध्यार प्यार ते दया दा प्रतीक ऐ। उपराष्ट्रपति जगदीप धनखड़ होरें बी लोकें गी ईस्टर दियां शुभकामनां दित्तियां न। उनें आक्खेआ जे ईस्टर प्रेम, करुणा ते माफी दा परतिये चेतता दोआंदा ऐ। प्रधानमंत्री नरेन्द्र मोदी ते जम्मू कश्मीर दे उपराज्यपाल मनोज सिन्हा होरें बी लोकें गी ईस्टर दी ममारकबाद दित्ती ऐ।

<><><><><><>

J&K 372 P.S

जम्मू कश्मीर च औंदे लोकसभा चुनां शा पैहले जम्मू रियासी संसदीय हल्के च 372 मतदान केन्द्रें दी संवेदनशील मतदान केन्द्र दे तौरा पंछान करिये सुरक्षा सरबंधी उपाह लागू कीते जा'रदे न। आकाशवाणी जम्मू संवाददाता दी रिपोर्ट मूजब अफसर समूलचे संसदीय क्षेत्र ते टकोहदा करिये संवेदनशील इलाकें च सुरक्षा दे पुख्ता बंदोबस्त करा करदे न। सरहद पार थमां पाकिस्तानी गोलीबारी दे खतरे सनें होर दुए मुमकल खतरें गी घट्ट करने दे मकसद कन्नै सुरक्षा बल कल संगारै पैहली अप्रेल थमां अपने टकोहदी ड्यूटी रंभ करी देंगन। चुनां आयोग दा एह फैसला जम्मू कश्मीर केन्द्र शासत प्रदेश बनने मगरा लोकसभा सीटें दी हदबंदी दी पच्छोकड़े च आया ऐ। इक्कले राजौरी जिले च गै सुदरबनी-कालाकोट हल्के च 124 मतदान केन्द्रें चा 102 गी संवेदनशील दे तौरा पर तालेआ गेआ ऐ। इस्सै चाल्ली जम्मू जिले च 1488 मतदान केन्द्रें चा 53 ते रियासी जिले च 425 चा 16 मतदान केन्द्रें गी संवेदनशील दे तौरा पर नामित कीता गेआ ऐ।



Nomination

जम्मू कश्मीर च 26 अप्रैल गी होने आले संसदीय चुनां दे दूर गेड़ लेई कल जम्मू लोकसभा हल्के थमां दो होर मेदवारें कल अपना नामांकनपत्र भरेआ ऐ। बीजेपी दे मेदवार जुगल किशोर शर्मा ते आजाद मेदवार सुरिन्दर सिंह होरें अपना नामांकन भरेआ। इनें दौनें मेदवारें आस्सेआ नामांकन पत्र जमा करोआने परेंत कुल जम्मू संसदीय हल्के ताई कुल मेदवारें दी गितनरी 4 होई गेई ऐ। इस हल्के लेई नामांकन पत्र भरने लेई खीरी तरीक 4 अप्रैल दपैहरी 3 बजे तगर ऐ।



Amarnath Yatra

जम्मू कश्मीर च आपदा प्रबंधन ते बचाह कम्में पर टकोहदा ध्यान देने कन्ने इस बरे आली श्री अमरनाथ जी यात्रा पर जाने आले शिव भक्तें दी सुरक्षा जकीनी बनाने दियां तैआरियां जोरे-शोरें कन्ने चला करदियां न। आकाशवाणी दे जम्मू संवाददाता दी रिपोर्ट ऐ जे 1300 सिखलाई याफता सैनिकें आला बचाह दल चुनौतीपूर्ण इलाकें थमां यात्रुएं दी सखाल लेई सांबा जिले दे नड इलाके च सरगर्मी कन्नै सिखलाई सरबंधी गतिविधिएं च जुटे दा ऐ। मजूदा समें च पुलस, एनडीआरएफ ते नीम फौजी बलें दे जुआन सांबा दे नड पहाड़ी इलाकें च टकोहदी सिखलाई लै करदे न। ध्यानजोग ऐ जे 7 बैचें दे 260 सैनिकें ते अफसरें अपनी सिखलाई पैहूले गै पूरी करी लैती दी ऐ। जून दे खीरें च रंभ होइयै दऊं म्हीने तगर चलने आली श्री अमरनाथ जी दी यात्रा च भगवान शिवें दा शीरवाद लैने ताई देस भर थमां लक्खां बद्धे भक्त ओंदे न।



J&K Observer

चुनां आयोग नै जम्मू कश्मीर च सब्बै 5 संसदीय हल्कें च दऊं-दऊं केन्द्री अब्सर्वरें गी तैनात करने दा फैसला लैता ऐ। तोआई प्रवेश चुनां प्राधिकरण सब्बने मतदान केन्द्रें ताई माइक्रो अब्सर्वरें गी नियुक्त करोग। साढे संवाददाता नै खबर दिक्ती ऐ जे इंदे चा इक सामान्य अब्सर्वर होग ते दुआ चुनां खर्च सरबंधी कम्म करोग। अब्सर्वर अलाट कीते गेदे इलाकें दा

दौरा लाइयै इस गल्ला गी जकीनी बनाने दा उपाह करगंन जे चुनां सुतैंत्र, निरपक्ख ते पारदर्शी तरीके कन्नै होन। इस्सै चाल्ली जम्मू कश्मीर दे मुख चुनां अधिकारी 5 लोकसभा सीटें दे सब्बै 11,629 मतदान केन्द्रें पर माइक्रो अब्सर्वरें गी तैनात करोग तां जे मतदान सुचारू ढंगै सिर करोआया जाई सकै। 4 जून गी वोटें दी गिनतरी आले ध्याड़े सब्बै अबसर्वर तैनात रौंहगन। खराब मौसम दे हालात बनने पर तकरीबन दर्जन भर मतदान केन्द्रें पर चुनावी अमले ते ओहदे समेयान गी जहाजें राएं पुज्जने लेई आपातकाल इमरजेंसी स्कीम बी तैआर कीती गई ऐ। इस सरबंधे च भारती वायु सेना थमां मदाद दी मंग कीती जाग। इनें इलाकें च किशतवाड़, भद्रवाह, वारवान, दच्छन, मचेल ते पाड्डर, कुपवाड़ा जिलें च करनाह, केरन ते माच्छिल ते बांदीपोरा जिले च गुरेज, तुलैल ते बक्तोर शामिल न।

<><><><><><>

News Click

दिल्ली पुलस नै न्यूज क्लिक पोर्टल ते एहदे संस्थापक प्रबीर पुरकायस्य हुंदे खलाफ गैर कनूनी गतिविधि रोकथाम कनून तैहत आरोप पत्र दायर कीता ऐ। इस न्यूज पोर्टल पर चीन दे पक्ष च प्रचार करने लेई धनराशि लैने दा आरोप ऐ। कोई 9 जहार पृष्ठें दे आरोप पत्र च जांच दरान बक्ख-बक्ख छापें च जब्त 480 इलैक्ट्रानिक उपकरणें सरबंधी जानकारी ऐ। पुरकायस्य दे खलाफ कश्मीर ते अरुणाचल प्रदेश गी भारत दा हिस्सा नेई दस्सने दा बी आरोप ऐ। दिल्ली दी पटियाला हाउस अदालतै 16 अप्रैल गी इस मामले च अगली सुनवाई निर्धारित कीती ऐ। न्यूज क्लिक दे संस्थापक गी पिछले बरें 3 अक्टूबर गी कंपनी दे एच. आर.प्रमुख अमित चक्रवर्ती सनें गिरफ्तार कीता गेआ हा। इंदे पर अमरीका राएं चीन थमां गैर कनूनी ढंग कन्नै रकम लैने दा आरोप ऐ।

<><><><><><>

ED Kailash

माली नियम-कायदे लागू करोआने सरबंधी निदेशालय ईडी नै दिल्ली दे ट्रांसपोर्ट मंत्री ते आम आदमी पार्टी दे नेता कैलाश गहलोत थमां 5 घंटे तगर पुच्छ-गिच्छ कीती ऐ। दिल्ली आबकारी नीति घोटाले कन्नै जुड़े दे मामले च एह पुच्छ-गिच्छ कीती गई। मगरा संवाददाताएं कन्नै गल्लबात च गहलोत होरें आक्खेआ जे उनें अजेंसी दे सब्बनें सुआलें दे परते दित्ते न ते अगगे बी जांच सैहयोग करगंन। उनें दस्सेआ जे एह प्रवर्तन निदेशालय दा

दुआ समन हा की जे तकरीबन इक म्हीने पैहले दिल्ली विधानसभा दे बजट सत्र कारण ओह
पैहले समन पर हाजर नेई होई सके हे।

<><><><><><>